

GUTFRAIDE

1. RIT

Ais 52:13-53:12

Akar dapanim: Iesus en osimtiziba ko mizaziba atera, egħa en arazir kuraba bangin an ovenge.

Akar kam, Godin akam inigha izir gumazim Aisaia, an osiri.

God ghaze, “Ia oragh, biziba bar nan ingangarir gumazim dar amuti, da deraghviram otivam.

Egħti gumaziba ziar ekiam a daningti, an ziam bar pin ikiam.

Me faragħa an mikarzim ko guam bar aning gasighasighizi, gumaziba an gari, a gumazimin mikarzim ko guamin min garir puvati.

Ezi gumazamiziba dikavir kuram gamua an ganān atiatingi.

Egħti gin kantrin aviribar gumazamiziba, ko men atriviba, me bizir me fomira nighnigha ganizir puvatizibar gan egh dagħ fofogħam.

Egh kamaghin, me uan akabar kumigh egh pura ganiva, dikavir kuram damuva bizitam mikiman asagħam.”

Ezi gumazamiziba akam ikaragħa ghaze,

“Tinara datirighin e orazir akaba nighnizir gavgavim adar iti?

Terara, Ikiavira Itir God, uan ingangarir gavgaviba isa men akazi, me dar gani?

Guizbangira, Ekiam uan ingangarir gumazim ataghizi, a mati temer mam nguazir mizingizimin oto.

Ingangarir gumazir kam, an ganganim tong en damazibar derazir puvati, kamaghin amizi, a ziaba puvati.

Ezi, bizir aghuitam an itir puvati, egħti e an ganiva a gakongam.

Ezi gumaziba akirim ragħa a gasaragħa, pazavira a gamua egħa bar a gifongezir puvati.

Ezi mizaziba ko osimtizir aviriba a gizifa.

Ezi gumaziba an ganān aghuagħa, me uan guaba ave.

Egħa bar akirim ragħa a gasara.

Ezi e an gara ghaze, a pura gumazir kinim.

E nighnigha ghaze, God ti ivezir kuram a ganiga a misogħa osimtizir kabagħ amizi, da a batifi.

Ezi puvati. Ingangarir gumazir kam e bagħ en osimtiziba ko mizaziba isa da ateri.

Ezi me, en akaba batozir arazim bagħa, an ekianim bira.

Arazir kurar e amiba bangin, me a dikabiragħa a gasighasiki.

Egħa me puv a misozima an mikarzim tintinibar biaghire, ezi mizazir a inizir kamān an e gamizi, e ghuamaghegħa ua deragħa, bar deravira iti.

Guizbangira, e bar mogħira sipsipbar min tintinbar arui, egħa e vaghvagħa uan ifongiabar gin arui.

Egħti Ikiavira Itir God, en arazir ikuraba ikarvagħsi pazaviram e damigham,

ezi puvati, a kamaghin amizir puvati.

A uan ingangarir gumazim gamizi, a en danganim inizi, e iniamin mizaziba, an ada isa a ganingī.”

Ezi Ekiam kamaghin migei,

“Gumaziba ingangarir gumazir kam pazav a gami, ezi a uabi dikabira egħa mizazir kuram ini.

Egħa migirigiar tam gamizir puvati.

A mati sipsipin nguzim akam
 dukuazi me a misueghti an
 aremeghasa a inigha zui.
 Egha uaghan mati sipsip
 me an arizibar aghorasava ami
 moghin, a bizitam migeir puvati.
 Ezi me puram a isa kalabus gatigha,
 egha a inigha kotin ghu, ezi kot a
 migia ghaze, an aremegham.
 Ezi me a misoghezi an areme.
 Egha an adarazir tav nighnigha
 kamaghin fozir puvati, a men
 danganim inigha mizazir me uari
 iniamin an a ini,
 egha an en gumamazibar arazir
 ikuraba akirva da gin amangasa
 areme.
 Ezi me an kuam isa gumazir arazir
 ikurabagh amiba ko, dagiar
 aviriba itir gumaziba ko anefa.
 Ezi e fo, a uabi arazir ikuratam
 gamizir puvati, egha a uaghan
 ifavarir akatam mikemezir
 puvati.”
 Ezi Ikiavira Itir God, uabi uan
 ifongiamin gin ghua uan
 ingangarir gumazir kam
 dikabiragha a gamizi a mizazim
 isi.
 A fo, ingangarir gumazim uan
 gumamazibar arazir ikuraba gin
 amangsi, ofan min uan mikarzim
 anighti, an ikirimirim bar
 ruaraghti, a uan ovavir boribar
 ganam.
 Egh ingangarir an amim, Ikiavira
 Itir God ingarasa ifongezir
 araziba, a dar amuam.

Egh a bizir kabar amuti, da
 deraghviram otivam.
 Ezi osimtizir ekia a inizir kamin gin,
 dar dagher aghuir aviriba otivti,
 a dar ganiva bar akuegham.”
 Ezi Ekiam kamaghin migei,
 “Nan ingangarir gumazir kam, a
 nan damazimin dera, egha a
 deraghavira na gifo.
 Egha a gumamazizir aviribar arazir
 ikuraba ateri,
 ezi arazir kamin a me damuti,
 me nan damazimin derazir
 gumamazizibar otivigham.”
 Kamaghin amizi, gumamaziziba an
 gari a mati gumazir ikuram.
 Ezi a gumamazizir avirimin arazir
 ikurabar osimtiziba atera, egha
 uabi uan mikarzim isa me bagh
 aneningigha areme.
 Egha a gumamazizir arazir ikurabagh
 amibar akurvaghasa God ko
 migei.
 Ezi kamaghin, ki gumazir gavgavir
 bar ekiaba itibar tongin ziar
 ekiam a daningam.
 Ezi mati midorozir gumazir
 gavgaviba, uan apaniba
 dikabiragha men bizir aghuariba
 inigha da tuisigha uan adarazigh
 aningizi moghin, ki bizir aghuiba
 isi a daningam.”

Kar Godin Akam.

SAM

Sam 31:2, 6, 12-13, 15-17, 25

Ia akam ikaragh: Afeziam, ki uan duam nin dafarim garisi.

O Ikiavira Itir God, ki nin aven modoghti ni na geghuv deragh nan ganasa,
 kamaghin ki ni bagha ize.
 Ni na ateghti, nan apaniba na abinti, ki aghumsighan kogham.
 Ni zurara arazir aghuim gami. Egh ni uan arazir aghuir kamin gin mangi nan
 akuragh! O Ikiavira Itir God, ki uan duam isa nin dafarim gati.
 Ni guizin arazibagh amir God, egha ni nan akuragha ua na inigha gifa.

Ia akam ikaragh: Afeziam, ki uan duam nin dafarim garisi.

Nan apaniba na dipova na migei.

Ezi nan namakaba nan aghuagha akar kurabar na migei.

Ezi nan roroaba uaghan, nan atiatigha ghaze, God ivezir kuram a ganidi.

Ki tuavimin zuir dughiabar, gumaziba nan gara nan ari.

Ia akam ikaragh: Afeziam, ki uan duam nin dafarim garisi.

Gumazim aremezi gumazamiziba bar a gin amadazi moghin, me na gin amada.

Ki mati, nguazir minem bighizi, me na makuni.

Ia akam ikaragh: Afeziam, ki uan duam nin dafarim garisi.

O Ikiavira Itir God, ni nan God,

ki nighnizir gavgavim nin iti.

Ki datirighin itir ikirimirir kam,

ki a isa nin dafarim gati.

Ni nan akuragh nan apanir nan agintizibar dafaribar ua na inigh.

Ia akam ikaragh: Afeziam, ki uan duam nin dafarim garisi.

Ki nin ingangarir gumazim, ni uan guam na mituazi an angazangarim na gisirazi moghin, kamaghira ni bar na gifuegh nan boroghira iki.

Ni zurara nan apangkuvighavira iti. Kamaghin, ni nan akurvagh! Ia

gumazamizir nighnizir gavgavim Ikiavira Itir Godin itiba,

ia uan navibar aven atiatingan kogh, egh tugh gavgavigh iki mamaghira iki.

Ia akam ikaragh: Afeziam, ki uan duam nin dafarim garisi.

2. RIT

Hi 4:14-16; 5:7-9

Akar dapanim: Iesus, Godin akamin gin zuir arazim, an a gifo, egha a gumazamizir an akamin gin zuiba, a men Akurvazir Gumazimin oto, eghti me deraghvira iki mamaghira ikiam.

Akar kam, a Hibrun akinafarimin aven iti.

Ezi e Ofa Gamir Gumazir Ekiabar Dapanir mam iti, ezi a bar Godin Nguibamin aven ghu. A Iesus, Godin Otarim. Kamaghin amizi, e nighnizir gavgavir e gun migeir kamin suiragh gavgavigham. E uari arazir kuraba dikabinamin gavgaviba puvati. Egh e kamaghin nighnighan kogham, Ofa Gamir Gumazir Ekiabar Dapanir kam, en nighnizibagh fogh en kuarkuvighan kogham. Puvati. Satanin ifavarir arazir e bativiziba, da uaghan bar a bativigha gifa. Ezi an arazir kuratam gamizir puvati. Kamaghin amizima, e atiatingan koghiva Godin atrivir dabirabimin boroghin mangam, Godin apangkuvim a gizifa. E a bagh mangitima God en

kuarkuvigh en apangkuvigham. Egh e osimtizitam ikiti an apangkuvim en akuragham.

Ezi dughiar Iesus nguazimin itim, a pamtemin God ko migia egha diav azi. A fo, an ovengan koghsi, God an akuraghamin gavgavim iti. Kamaghin ami a uabi uan ifongiam dikabiragha egha Godin apengan ikia, an akam barasi. Ezi God an dimdiam a barasi.* Guizbangira Iesus a Godin Otarim, egha a mizazim ini. Ezi tuavir kamra a Godin akamin gin zuir arazim an a gifo. Egha a uan ingangarir a damuamiba, a bar da gifa. Ezi God anemisevegha ghaze, “Ni Ofa Gamir Gumazir Ekiabar Dapanimin ikiam, egh Melkisedekin min ikiam.”

Ezi a gumazamizir an akam baregha
egha an gin zuiba, a men akurvazir
gumazimin oto. Egh a men akurvaghti
me deravira iki mamaghira ikiam.

Kar Godin Akam.

WELKAMIM GUTNIUS

Ekiame Kraia Iesus, e nin iziam fa iziar ekiame ni ganidi.

Kraia uabi abiragha Godin akabar gin ghua iza dughiar a temem gisin aremezimin
tu. Bizir kam bagha God Iesus fegha a isa bar pin mar anefa. Egha God iziar mam a
ganingi, a bar deragha iziar maba bar dagh afira.

Ekiame Kraia Iesus, e nin iziam fa iziar ekiame ni ganidi.

AKAR AGHUIM

Jo 18:1-19:42

(S = Stori; J = Jisas; W = wan wan man o meri; O = olgeta)

Kar, Kraia Iesus mizazim inigha aremezir eghaghanim, Jon an osiri.

S: Ezi Iesus kamaghin God ko mikemegha givagha, egha uan suren gumaziba ko
me ghua Kidronin Zarim girigha vongin ghu. Ezi dipar kamin vongin azenir
mam iti, ezi Iesus uan suren gumaziba ko me azenir kamin aven ghue. Dughiar
aviribar Iesus uan suren gumaziba azenir kamin me batifi. Kamaghin Judas, a
Iesus isi gumazir apanibar agharim darighamim, a uaghan azenir kam gifo. Egha
Judas, a Romin midorozir gumaziba ko, ofa gamir gumazir ekiaba ko Farisiba
amadazir plisin maba, a me inigha danganir kamin ghue. Egha me adenir aviba
ko lamba ko midorozir biziba sara suigha zui. Ezi Iesus bizir a bativamiba a bar
dagh fo. Egha a sivagha men boroghira ghua egha kamaghin me azai,

J: “Ia tina buri?”

S: Ezi me kamaghin an akam ikara,

O: “E Nasaretin gumazim Iesus buriasa izi.”

S: Ezi Iesus me migei,

J: “Kar kirara.”

S: Dughiar kam Judas, a gumazir Iesus isa me ganidim, a me ko tughav iti. Me Iesus
barazi a migei, “Kar kirara,” egha me ua sivagha ghua nguazim gire. Ezi Iesus ua
men azara,

J: “Ia tina buri?”

S: Ezi me ghaze,

O: “Nasaretin gumazim Iesus.”

S: Ezi Iesus kamaghin men akam ikara,

J: “Ki ia mikemegha gifa, kar kirara. Kamaghin ia na buriva, gumazir kaba ateghti
me mangi.”

S: A kamagh sua an akar fomira mikemezim, an daghem otogham, “Ezi gumazir ni
na ganingiziba, men tav ovengezir puvati.” Kamaghin an arazir kam gami.

Ezi Saimon Pita midorozir sabar mam inigha ize, egha uan sabam a mikirigha egha ofa gamir gumazir ekiabar dapanimin ingangarir gumazim misuegha, egha an kuarir guvimin itim atu, ezi a iri. Ingangarir gumazir kamin ziam, Malkus. Ezi Iesus Pita migei,

J: “Ni sabam inigh ua an nodozim darugh. Manmagh ami? Ni ghaze, ki ti Afeziam na ganingizir osimtizir kam inian kogham, o?”

S: Ezi Romin midorozir gumaziba ko men gumazir ekiam, ko Judan plisin gumaziba, me Iesusin suighava egha benimin a ike. Egha faraghava a inigha Anas bagha ghu. Anas a Kaiafasin ivozir afeziam. Kaiafas a azenir kamin ofa gamir gumazir ekiabar dapanim. Egha Kaiafas, Judaba kamaghin me mikemezir gumazim, “Kamaghin a dera, gumazir vamira gumazamizibar danganim inigh egh aremegham.”

Ezi Saimon Pita ko suren gumazir igharazir mam, aning Iesusin gin zui. Ofa gamir gumazir ekiabar dapanim, a suren gumazir kam gifo, ezi kamaghin a Iesusin gin ghua ofa gamir gumazir ekiabar dapanimin dipenimin divazimin aven ghu. Ezi Pita azenan ikia tiar akamin boroghira tughav iti. Ezi suren gumazir igharazim, a ghua amizir tiar akamin garim mikemegha, egha Pita inigha aven zui. Ezi amizir tiar akamin garim a kamaghin Pitan azara,

W: “Ni ti uaghan gumazir kamin suren gumazim?”

S: Ezi Pita ghaze,

W: “Puvati. Ki an suren gumazim pu.”

S: Ezi danganim bar orange. Kamaghin amizi ingangarir gumaziba ko plisin gumaziba me avir mam ati. Egha me avimin fiava an min tuivighav iti. Ezi Pita uaghan me ko tughav ikia egha avimin fia iti.

Ezi dughiar kamin ofa gamir gumazir ekiabar dapanim, a Iesusin suren gumaziba ko akar a men sure gamizim bagha, a Iesusin azangsisi. Ezi Iesus kamaghin an akam ikara,

J: “Ki gumazamiziba azenara me mikeme. Egha ki zurara God ko migeir dipeniba ko Godin Dipenimin aven gumazamizibar sure gami. Kar danganir Judaba bar uari akuviba. Ki modogha akatam mikemezir pu. Ezi manmagh amizi ni nan azangsisi? Ni gumazir akar kam baraghizibar azangsigh. Me ki mikemezir akam gifo.”

S: Iesus kamaghin migeima ezi plisin gumazir mam tughav ikia, egha an an guam a misuegha kamaghin migei,

W: “Ni kamaghin ofa gamir gumazir ekiabar dapanimin akam ikara, kar ti arazir aghuim, o?”

S: Ezi Iesus kamaghin an akam ikara,

J: “Ki akar kuratam mikemeghti, eghti ni deravira akar ki mikemezim an gun mikim. Eghti ki migirigiar aghuim damighti, ezi ni tizim bagha na apese?”

S: Ezi Anas Iesus isa ofa gamir gumazir ekiabar dapanim Kaiafas bagha anemada. Egha me Iesus ikezir benim firizir puvati.

Saimon Pita tughav ikia egha avimin fii. Ezi me kamaghin an azara,

O: “Ni ti uaghan an suren gumazir mam?”

S: Ezi a migei,

W: “Puvati. Ki an suren gumazim puvati.”

S: Ezi ofa gamir gumazir ekiabar dapanimin ingangarir gumazir mam iti, a Pita kuarim atuzir gumazimin adarazir mav. A ghaze,

W: “Ki ti nin gani, ni Iesus ko azenimin aven ikes?”

S: Ezi Pita ua migei,

W: “Puvati.”

S: Ezi dughiar kamra tuarim ake.

Egha Judaba Iesus inigha Kaiafasin dipenim ategha an akua gavmanin dapanir ekiamin dipenimin zui. Ka bar mizaraghara. Egha me ghaze, “E Godin damazimin mizeghiva, egh e God Israelbagh Itazir Dughiamin isar ekiamin asizim rameghan kogham.” Kamaghin amizi, me uari gavman dapanir ekiamin dipenimin aven ghuzir puvati. Me azenan iti, ezi Pailat me bagha izi, egha kamaghin men azara,

W: “Ia akar manam gumazir kam gasarazi, a kotin iti?”

S: Ezi me kamaghin an akam ikara,

O: “An arazir kuram gamir puvatizi, e ni bagha a inigha izeghan koghai.”

S: Ezi Pailat kamaghin me migei,

W: “Kamaghin, ia a inigh mangiva uan Arazibagh isin a tuisigh.”

S: Ezi Judaba kamaghin akam ikara,

O: “E gumazir tam puram a misueghti an aremeghan kogham.”

S: (Iesus fomira uan ovengamin arazim migei. A kamagh sua, an akar kam guizbangira otivam, ezi kamaghin Pailat ko Judaba kamaghin uariv gei, ezi bizir kam oto.)

Ezi Pailat uamategha gavmanin dipenimin aven ghua, egha Iesusin diazima a izi. Ezi a kamaghin an azara,

W: “Ni Judabar Atrivim, o?”

S: Ezi Iesus kamaghin an akam ikara,

J: “Ni uabi nighnigha egha ni akar kam gami, o gumazir igharazitam nan gun ni mikeme?”

S: Ezi Pailat kamaghin an akam ikara,

W: “Manmaghin ami? Ni ghaze, ki Judan mav, o? Ni uan adarazi ko ofa gamir gumazir ekiaba, me nin akua na bagha ize. Ni bizir tizim gami?”

S: Ezi Iesus kamaghin an akam ikara,

J: “Ki nguazir kamin atrivim puvati. Ki nguazir kamin atrivimin ikiai, kamaghin nan ingangarir gumaziba na bagha misoghai, egha tav na isa Judabar agharim gatighan koghai. Ezi ki nguazir kamin atrivibar min ingarir puvati.”

S: Ezi Pailat an azara,

W: “Ezi ni guizbangira atrivir mam, o?”

S: Ezi Iesus kamaghin akam ikara,

J: “Atrivimin migirigiar kam, kar nin akamra. Amebam na batezi ezi ki nguazir kamin ingangarir vamira damuasa ize. Ingangarir kam kamakin: ki guizin akam akunam. Egha gumazir guizin akamin gin mangamiba, me nan akam barasi.”

S: Ezi Pailat an azara,

W: “Guizin akam, a bar bizir tizimra?”

S: Pailat mikemegha givagha egha ua Judaba bagha azenan ghu. Egha kamaghin me migei,

W: “Ki an arazir kuratam batozir puvati. Egha ia, arazir ki gin zuir kam, ia a gifo. Ezi azeniba bar, God Israelbagh Itazir Dughiamin, ki ian arazimin gin ghua gumazir vamira kalabusin a isa azenim gati. Ia ifueghti ki Judabar atrivir kam firigh ia bagh anemangam, o?”

S: Ezi me kamaghin dia ghaze,

O: “Mam puvati! Ni Barabasra firigh!”

S: (Barabas, a gumazir okeim egha uaghan misosi.)

Ezi Pailat me mikemezi me Iesus inigha a ifozorosi. Ezi midorozir gumaziba dikoniba itir beniba inigha egha atrivimin dapanir asuamin min an ingarigha, an dapanim garu. Egha me korotiar agheviri mam a garu. Egha me an boroghira izegha a migei,

O: “Judabar Atrivim, nirara atrivir ekiam!”

S: Egha me kamaghin miyiava an guam apezavira iti. Ezi Pailat ua azenan ghugha kamaghin gumazamizibav gei,

W: “Ia oragh. Ki a inigh ia bagh azenan izam, eghti ia fogham, ki an arazir kuratamin apizir puvati.”

S: Ezi Iesus azenan zui. Ezi dapanir asuar me benir dikoniba itimin ingarizim, an an dapanimin ikiavira iti. Ezi korotiar agheviri kam, a uaghan an ikiavira iti. Ezi Pailat me migei,

W: “Ia gan, gumazir kam a kara.”

S: Ezi ofa gamir gumazir ekiaba ko plisin gumaziba an ganigha kamaghin dei,

O: “Ter ighuvimin a gafugh! Ter ighuvimin a gafugh!”

S: Ezi Pailat kamaghin me migei,

W: “Ia uari a inighiva egh ter ighuvimin a gafugh. Ki uabi, ki an arazir kuratamin apizir puvati.”

S: Ezi Judaba kamaghin an akam ikara,

O: “A uabi ghaze ‘Ki Godin Otarim.’ Ezi en Arazibar Osizirir mam iti, ezi arazir kam kamaghin migei, gumazir kamagh migeim, an aremegham.”

S: Ezi Pailat akar kam baregha egha bar atiatingi. Egha a ua ghua gavmanin dipenimin aven ghugha, egha kamaghin Iesusin azai,

W: “Ni nguibar manamin ikegha ize?”

S: Ezi Iesus an akar kam ikarazir puvati. Ezi Pailat a migei,

W: “Manmaghin amizi ni nan akam ikarvaghan aghua? Ki ni firighamin gavgavim iti, egha uaghan ni isiv temer ighuvim gafughamin gavgavim iti. Ezi ni ti bizir kam gifozir puvati?”

S: Ezi Iesus kamaghin an akam ikara,

J: “Godin pin itim, a gavgavim ni ganingizir puvatighai, ni na dikabinamin gavgaviba puvatigham. Ezi gumazir na isa nin agharim gatizim, an arazir kuramin osimtizim, a nin arazir kuramin osimtizim, bar a gafira.”

S: Pailat akar kam baregha egha Iesus ateghti a mangasa tuaviba buri. Ezi Judaba kamaghin dei,

O: “Ni gumazir kam ateghti a mangiti, ni Sisarın namakam puvati. Guizbangira, gumazim uabira uabi migia ghaze, an atrivim, egha a Sisarın apanim.”

S: Pailat akar kam baregha, egha Iesusin akua azenan ghu. Egha a jasin dabirabim gaperaghav iti, danganir kam me ‘Dagiar Azuarim’ a garisi. (Hibrun akam me ghaze, ‘Gabata’).

Ezi dughiar kam a dughiar me God Israelbagh Itazir Dughiamin isam bagha daghebar amuva bizibar kiram. Kar aruer arizim. Ezi Pailat Judabav gei,

W: “Ia ganigh! Ian Atrivim kara.”

S: Ezi me kamaghin dei,

O: “A batokegh! A batueghti a mangi! Ter ighuvimin a gafugh!”

S: Ezi Pailat men azara,

W: “Ia ifonge, ki ian Atrivim isi ter ighuvimin a gafugham?”

S: Ezi ofa gamir gumazir ekiaba kamaghin akam ikara,

O: “E atrivir igharaziba puvati. Sisar bar uabira!”

S: Kamaghin amizi Pailat Iesus inigha, me ter ighuvimin a gafughasa, a men agharim gati.

Ezi me Iesus inigha zui. Ezi a uabi uan ter ighuvim gupugha, egha nguibar ekiam

ategha egha danganir mamın zui, an ziam ‘Dapanir Agharir Danganim.’ (Ezi Hibrun akam me ghaze ‘Golgota.’) Ezi danganir kamin me a isa ter ighuvimin anegura. Egha me gumazir igharazir pumuning a ko, aning agura, mam vongin itima, mam vongin iti. Ezi Iesus aningın torimin iti.

Ezi Pailat uaghan me migeima me ziar mam osirigha ter ighuvim gati. Ziar kam a kamakin, “Nasaretin Gumazim Iesus, Judabar Atrivim.” Me ziar kam, Hibrun akam ko Romin akam ko Grighin akamin, men akabar an osiri. Danganir me Iesus ter ighuvimin anegurazim, a nguibar ekiam boroghira iti, kamaghin amizi Judan avirim izava osizirir kamin gara egha a dibori.

Ezi ofa gamir gumazir ekiaba kamaghin Pailat migei,

O: “Ni kamaghin osiran marki, ‘Judan Atrivim.’ Bar marki. Ni ziam kamaghin an osirigh, ‘Gumazir kam ghaze, ki Judabar Atrivim.’ ”

S: Ezi Pailat men akam ikara,

W: “Marki. Akar ki osirigha givazim, a kamaghira iki.”

S: Midorozir gumaziba ter ighuvimin Iesus gafugha givagha, egha gin me an korotiaba inigha egha 4 plan akuabar uari rome. Egha me akuar vamira vamira isi. Egha me uaghan an korotiar ruarim sara ini, egha midorozir gumaziba kamaghin gari, me inir akuar aviriba inigha korotiar ruarir kam isamizir pu. Puvati. Me inir vamiрам an ingari, egha me a isamizir puvati. Egha midorozir gumaziba kamaghin uarira uariv gei,

O: “E korotiar ruarir kam abighan kogham. Puvati. E satu gikararangiva gumazir a iniamim gifogham.”

S: Godin Akinafarimin itir akar mam kamaghin migei, “Me nan korotiaba tuiragh, egh uari daningam. Egh me satu gikararangiva gumazim amiseveghti a nan korotiar ruarim iniam.” Ezi akar kam guizbangira otoghasa, kamaghin arazir kamra midorozir gumaziba a gami.

Ezi Iesusin amebam ko, an amebamin afumim ko, Klopasin amuim Maria ko, Makdalan nguibamin amizim Maria, me bar an ter ighuvimin boroghira tuivighav iti. Ezi Iesus garima an amebam ko suren gumazir a bar ifongezim, aning roghira tughav iti. Ezi a kamaghin uan amebam migei,

J: “Amizim, gumazir kam datirighin, a nin otarim.”

S: Ezi a kamaghin suren gumazir kam migei,

J: “Amizir kam, a datirighin nin amebam.”

S: Ezi dughiar kamin ghua, suren gumazir kam Maria inigha uan dipenimin ghugha egha an gara uan amebamin min a gami.

Ezi Iesus fo, an ingangariba datirighin bar gifa. Egha a kamaghin migei,

J: “Nan kuarim nan piri.”

S: Godin Akinafarimin itir akar mam guizbangira otivasa, kamaghin an akar kam gami. Ezi miner mam wainin afangtizim an ikia roghira iti. Egha me dipamin suizir bizim inigha egha wainin dipam garu. Ezi wain a gizivazima, me a isa

hisopin aghorim gikegha a isa Iesusin akam darighasa an amadi. Ezi Iesus wainin kam amegha givagha, egha migei,

J: "A datirighin gifa."

S: Egha a dapanim aviragha egha uan duam sue.

(Ol i nildaun na pre liklik.)

S: Kar dughiar me Sabat bagha bizibar akirim. Sabatin dughiar kam, a dughiar bar ekiam. Kamaghin amizima Judaba me gumazir kuaba dughiar kam temer ighuvibar ikian me aghua. Egha me Pailat kamaghin an azangsigha ghaze, a men amamangatighti me temer ighuvibar itir gumazibar suer agharibav sogh da apirighti, me zuamiram aremeghti me men kuaba adegh izighram. Ezi midorozir gumaziba ghua gumazir Iesus ko guraghav itir mamin suer agharimning misogha aning apirigha, egha ghua gumazir igharazim uaghan an suer agharimning misogha aning apiri. Egha me iza Iesusin garima an aremegha gifa. Kamaghin amizima me an suer agharimning apirizir puvati. Ezi midorozir gumazir mam afuzim inigha Iesusin ivim bira. Ezi ghuzim ko dipam zuamira ire. (Ki, Jon, ki gumazir bizir kamin ganizim, ki kamaghin ifonge, ia bizir kam gifoghiva nighnizir gavgavim an ikiam. Kamaghin ki an gun ia migei. Akar ki gun migeir kam, a guizbangira. Ki uabi fo, ki guizbangira migei.) Godin Akinafarimin itir akar mam, a kamakin, "Me an agharitam apirighan kogham." God kamagh sua, akar kam guizbangiram otogham, ezi kamaghin bizir kam oto. Ezi akar igharazir mam Godin Akinafarimin iti, a kamakin, "Me, gumazir afuzimin ruazir kam bagh ganam."

Ezi gin Arimatean nguibamin gumazim Josep ghua Iesusin kuam iniasa Pailatin azangsisi. Josep a Iesusin suren gumazir mam, egha a Judabar atiatigha, egha uan nighnizir gavgavim modo. Ezi Pailat an amamangatizi, a ghuava Iesusin kuam ini. Ezi Nikodemus, gumazir faragha dimagarimin Iesusin ganizim, a uaghan ize. Egha borer mughuriar aghuir maba inigha ize, me temer pumuningin borem inigha aning veregha, egha borer kam gami. Ezi borer kamin osimtizim 30 plan kilogramin ghu. Ezi Josep ko Nikodemus aning Iesusin kuam inigha borer kam an kuam gaghui. Egha inir aghuimin an mikarzim nomke, Judaba uan gumazir oveaghuezibagh ami moghin. Ezi midorozir gumaziba Iesus ter ighuvimin anegurazir danganir kamin boroghira, azenir mam iti. Egha azenir kamin mozir igiar mam iti, me dagiar torim atugha, egha me faragha gumazitamin kuatam a gatizir puvati. Kar dughiar Judaba Sabatin dughiam bagh bizibar kiramim, ezi mozir kam, a Iesus aremezir danganim boroghira iti. Kamaghin amizi, aning Iesusin kuam inigha ghua mozir kamin aneti.

